

# Fasnachtsvörse 2010 vo de Zibelegringe



A der Uni, im Altersheim oder im Spital:  
Hochdütsch zellt, die Schwobe sy itz überall.  
Es syge super Lütt, säge d Behörde, u andersyts  
heigs z Dütschland geng no meh vone als ir Schwiiz.

Als Nudist bin i gärn am ene FKK-Strand  
und uf Nacktwanderige im Appezällerland.  
Jetz gah ni uf e Flughafe ga schaffe,  
dert chan i die Blutte im Nackt-Scanner ggaffe.

Trotz Minarett-Verbot, dr Halbmond tuet blybe.  
Jetz wott me das Islam-Symbol o no vertrybe.  
D SVP hett en Idee, si lanciert drum sofort  
e Volksinitiative für nes Gipfeli-Verbot.

Gester am Abe ha ni doch im Fernseh  
wieder so ne exklusivi Choch-Sändig gseh.  
Zwüsche düre bin i schnäll i d Chuchi grennt,  
myni Böhse-Böhli i dr Pfanne sy verbrönnnt.

Ar Bundesgass, da stöh 3 jungi adretti Froue;  
Was si ächt so choste, fragen i - im Vertroue.  
He geits no? Im Büro isch es drum verbote,  
mir müesse üsi Zigi jetz vorusse schlote!

E Zürcher wott uf Bärn, es göng ja itze schnäll  
mit em Outo i d City, dank däm Neufäld-Tunäll.  
Chasch danke, dä Ma isch verscholle im Stou,  
zwüschem Grauholz u em Viadukt vor Felsenou.

Ämmitaler Chäs git Chraft, mi wärdi chächer;  
aber d SCL Tigers frässe allwäg nume d Löcher?  
Em Tiger Woods hilft dä Chäs, wi me cha gseh,  
näbem Golf schafft dä no viel anderi Löcher meh.

Härkunft, Inhalt, Haltbarkeit u Garantie  
müesse hütt uf allne Produkt bezeichnet sy.  
Ou z Verfalldatum isch überall jetz druffe;  
Bim Leuebärger isch das scho lang ab-gloffte.

Mir chämpfe u sötte no für d Stüüre spare,  
z Gäld längt nümme für i d Ferie z fahre.  
Mache mer doch Schulde so wie üsi Bänker,  
de gits derzue no dicki Gschänker.

Dr Säuligrippe-Virus het em Vasella telefoniert:  
Gäll, kennsch mi nümme, i bi drum chly mutiert.  
Super, de packe mer dä Impfstoff i andri Päckli y,  
und via BAG lanciere mer e neui Pandemie.

Medwedews vo Russland sy uf Staatsbsuech cho,  
u Bärn hett 2 härzigi schwarzi Bärli übercho.  
Jetz tüe mir üs z Moskau nobel revanchiere,  
und e schwarze YB-Kicker transferiere.

D Schwiiz isch Wältmeister worde, s hett üs freut.  
Die junge U17-Giele hei s im Schutte allne zeigt!  
Xakha, Ben Kalifa, Kiassumba oder Seferovic -  
die Nämme passe bestens o i d A-Nati vo dr Schwiiz.

Dr Ueli wott geng no die beschti Armee vor Wält.  
Aber är mues spare, a allne Egge fählt s am Gäld.  
Jetz chöi de d Soldate y-rücke wi si wei,  
in zivil u mit jedem Plunder vo dahei.

I sueche e Stell, won i zünftig chönnt kassiere.  
Bi de Banke geits nid, die tüe Pärsonal reduziere.  
Jetz probier i, ob s mit ere Datebank würd loufe,  
de chönnt i CDs uf Dütschland verchoufe.

Dr Didier vo Neuburg isch guet u o no früsch.  
Ja, meinsch itz dr Défago oder dr Cuche?  
Nei, dänk dr Conseiller Burkhalter Didier.  
Isch das e Neue? Dä han i no nie a me Renne gseh.

Schoggi, Buecher, Hundefuetter u Kaländer,  
uf der Post gits all das Züüg uf Regal u Ständer.  
U wie chunnt my Brief uf Konolfinge?  
E Margge druf, u sälber bringe!

Statt z Kalifornie i der Chiste,  
stahn i z Gstaad mit de Ski uf der Piste!  
Was mi stört, i bringe der linggi Schueh  
wäg dere cheibe Fuessfessle nid rächt zue.

Als neui Nutzig chönnt me im Bäregrabe, im alte,  
jetz so öppis wi Gladiatore-Kämpf abhalte.  
Mit Grossratskandidate, wo enang uf d Schnure gäh:  
Zum Byspiel die vor BDP gäge die vor SVP.

D Giele trage ihri Jeans unger de Füdlebacke,  
hingäge d Modi, die tüe d Fudi ganz äng y-packe,  
gsehsch, ob drunger Slip oder kene. Aber am Ändi  
chunnt si nümme use - Vercher nur no via Handy.

z Trudi seit: Nach der Operation vom graue Star,  
gseh ni wieder ohni Brülle, es isch wunderbar.  
Warum tuesch de glych no mit Brülle ume-renne?  
Wüll mi d Lütt süsch nümme kenne!

Jetz söll s de o no Umwält-Stüre gäh für z Veh,  
wägem Methangas, wo die Viecher hinger use löh.  
Nächstens chöme Zibele dra, wäg de üble Grüch,  
u am Änd no d Zibelegringe, wäg de fuule Sprüch?